

摛藻堂四庫全書薈要

集部

欽定四庫全書叢書要

集部

御選元詩卷三十二

詳校官原任主事臣李斯咏

欽定四庫全書  
薈要卷一萬八千四百四十四集部

御選元詩卷三十二

七言古詩九

楊維楨

自題鐵笛道人像

道人煉鐵如煉雪丹  
鐵火花飛列缺神焦  
鬼爛愁鎻鏹精魂夜語  
吳鈎血居然躍冶作龍吟  
三尺笛成如竹截道人天聲閟  
天寂媧皇上天補天裂淮南張涯人中傑



愛畫道人吹怒鐵道人與笛同死生直上方壺觀日月

題趙仲穆臨黃筌秋山圖

成都畫師稱要叔不獨錦雞兼寫竹李昇筆法最稱神  
萬里雲山出西蜀重巒疊嶂金碧堆丹崖楓樹如花開  
銀河著地可望不可到上有仙家十二之瓊臺峨眉玉  
壘天邊落萬雉金城連劒閣雪山西蜀為武擔石鏡清  
輝纏井絡江邊里枯似沉犀水怪不敢湍金隄支機石  
在嚴真觀浣花水落少陵溪蜀王宮殿牛羊下鼓吹却

入雞豚社雪飛水磨舊敲茶春釀郢筒荷熟羞草田麥  
壠煙光薄交鹿呦呦雉角角何處山僧赤腳歸空林野  
水日欲落吳興小趙精天機出入內府閱秘竒親摹此  
本第一幅閉戶三月忘朝飢老夫平生有山癖草元亭  
前雙眼碧江上何處未歸來黃鶴高樓吹鐵笛

題柳風芙月亭詩卷

主家池館西龍塘龍塘華國參差芳秋輪軋露春雲熟  
水風楊柳芙蓉月星橋高挂東西虹宮花小隊煙花紅

金絲拂鞍長袖舞夜靜水涼神欲語草池夢落西堂客  
吟詩一夜東方白

袞馬圖

唐家內厩三萬匹畫史縑絹都熟識綠蛇連卷骨初蛻  
一團旋風五花色濕雲乍洗烏龍池金索掣斷愁欲飛  
奚官獨立柳陰下手把玉鞭將贈誰

飲馬圖

佛郎新來雙象龍鼻端生火耳生風臨流飲水如飲虹

波光倒吸王良宮吁嗟青海頭白磧尾渴烏一失金井  
水長城窟遠腥風起

趙大年鶩圖

鏡湖湖上春波明  
灣磈樹樹鶩黃青上有金衣美簧舌  
下有紅掌浮繡翎  
春鋤一白能自好尚嬾性帶鷓鴣腥  
眼明見此羣鸞鸞不與匹  
鳥爭春晴大年筆法如蘭亭  
宛頸箇箇由天成  
艮宮流落二百載  
胡賈不厭千金爭  
却恨會稽內史無此筆  
為人辛苦書黃庭

明皇按樂圖

沉香亭前花萼下

叶戶

天街一陣催花雨海棠花妖睡初

著喚醒一聲紅芍藥金鑾供奉

調清平梨園舊曲換新

聲阿環自吹范陽笛八姨獨操傷春情君不見夜遊重

到明月府青鸞能歌兔能舞五雲不障蚩尤旗回首煙

中萬鼙鼓那知著底梧桐雨雨聲已入淋鈴譜

題王母醉歸圖

瑤池春暖波如澈不與紅妝洗嬌面仙娥泛月慈宮來

催宴瓊花開水殿麻姑滿進九霞觴金盤鮓熟夫容香  
歌雲緩繞紫鸞管舞飈淑洒青霓裳阿母嬉春淡壯東雲  
冠巧琢梅花玉酒痕凝頰呼不醒扶上仙山雪毛鹿綺袍  
半脫露香肩飛控不動金連錢天風吹夢渡弱水含羞倦  
倚雙嬋娟歸來笑拂龍髯席汗濕絞綃睡無力玉鈎齊上  
水晶簾十二璣樓月光白吳興畫史筆如神丹青貌得瑤  
池真劉郎自是識仙趣看花同賞玄都春圖中彷彿一相  
見何必蓬萊問清淺便呼青鳥報鸞箋端桃明日重開宴

# 湖光山色樓

仙家十二樓俯瞰芙蓉渚象田耕玉煙龍氣生珠雨鳳麟遠水接空濛小瀛夜折蓬萊股蘭臺美人能楚語十  
三雁急孤鸞舞仙人醉騎黃鶴來酣揮落日使倒迴剪取璣田一稜歸滿天鐵笛走春雷

## 蓮花埠在太湖之西薊氏村

棟花風殘啼鳩舌蓮花埠上春三月埠上女郎齊踏歌輕衫白苧飄香雪青山深鎖薊家村使君艇子恰當門

門前滿樹櫻桃子手摘櫻桃招使君使君本是龍門客  
身脫宮袍岸烏幘何處江南最有情新買蓮花埠上宅

甲申臘月廿五日初度

去年生旦吳山雪我食無魚客彈鋏今年生旦逢立春  
座上簪花寫春帖主人錦筵相為開烹羊羔作春杯  
柳車昨夜送窮去羯鼓今日迎春來家人祝詞心轉急  
富貴今年當五十男兒富貴絕可憐年少光陰胡可及  
大姬白題作霓舞小姬吳歛歌白苧丹穴錦毛飛鳳皇

海樹紅芽語鶼鷀兩家公子與玉觴酒酣起把雙銀船  
胸吞笠澤三萬頃氣卷渴鯨千丈長座中有客吾宗老  
玉山不受春風倒歌詞自作風格高合樂鶯聲一時好  
夜如何其且秉燭主人奉驩為不足主人交誼晚誰似  
四海弟兄同骨肉我歌醉歌君擊缶金搏琵琶勿停手  
洞庭君獻橘雙頭飲以洞庭春色酒輪雲世事知何有

題高郵何將軍老山圖

何家將軍多愛山以小比老尤堅頑青山面目元不老

將軍却笑鬚眉斑  
崑崙何時鼈背裂  
將軍氣高嵩華絕  
小夫移山良自愚  
將軍一怒天柱折  
天柱折天山已定  
三飛鶻凱歌十二和  
歸橈殘山剩水在  
何處第五橋北南塘均  
太平天子方講道  
將軍六十便稱老  
黃金雨外棄甲拋  
白玉風前醉山倒  
宣州畫生來作圖  
圖中貌得詩人臞  
銀瓶索酒豪尚在  
腰間屢解雙珠符  
門前好事復載酒  
東山攜來散花手戎  
王子花歌月支落日  
平臺舞楊柳玉堂醉  
草寫烏絲時與盧老  
同襟期將軍風韵有如此

何必酷似劉牢之當時爾祖得鄭杜尚帶儒酸走風雨  
何如盧後更逢楊亦復有客如此不

錢惟善

八月十五夜風雨後見月有懷

天柱風高月華碧自古人間風雨隔飄然欲探蟾窟遊  
萬里陰霾妒良夕元雲忽開黃道明顧免涵秋抱冰魄  
嫦娥偷藥長少年桂子鄉霏羽衣濕飛仙挾我凌太清  
萬丈寒光湛虛白美人不來空夜涼白苧歌闌露花積

湘淚竹管

黃陵廟前捐珮玦龍影搖文織湘血翠帷塵滴不乾雲  
湘水無聲楚魂咽蠻娘羨作吳娥吟五音嘹亮生枯節  
一聲直向天上聞手挾飛仙挽秋月嗚嗚似向煙中語  
十二螺鬟排律呂黃鶴樓空人不還斷腸聲裏招神女

江聲得五字

小海歌闌渺平楚中流日暮猶鳴櫓怪疑鐵笛和龍吟  
清應冰絃出魚舞響入蘆花暗長潮寒吞樹影晴飛雨

遡源欲聽巫峽秋夢繞峨眉月三五

張昱

題華光梅

墨梅之作盛衡湘始作俑者唯華光此僧平生十萬紙  
筆力所到花為香是誰好事憐清苦三二百年存絹素  
和靖多情縱有詩廣平得意還能賦東坡先生昔倅杭  
萬松嶺見一枝長我今見畫如昨夢都在君家白玉堂

王逢

聽鄭廷美彈琴

畫闌月照芙蓉霜博山水暖薔薇香石屏石几青黛光  
鄭鄉君子琴中堂榴裯蕙帶醉羅洞玉珮朱瓔脫飛鞚  
何處春深雲滿林小巢並語梧花鳳君不見湘靈鼓瑟  
湘江許苦竹祠荒愁暮雨遺音一聽增感傷使我無言  
重懷古重懷古鷄喔喔明星爛漫東城角誰家尚奏桑

間樂

題留侯小像

漢高三尺劒子房三寸舌剛柔兩相濟秦降楚隨滅君  
不見乾坤狡兔飛鳥秋脫使子房無世仇箕棲願飲老  
則休

夜過蒼墩江隱居

白茅蕭蕭風色昏歸人自語煙際村我騎蹇驢童抱尊  
記得君家忘却門徑穿竹入背江路傍是梁朝敬宗墓  
月中對鶴吹洞簫露水琤然落高樹

趙文敏公山水為董竹林山長題

并序

公於畫左題云至大三年六月望日為吳彥良畫  
並詩有岸靜樹陰合溪晴雲氣流之句想在鷗波  
亭作也彥良嘉禾人

何山弁山秀可掬上若下若賚茗綠翰林學士偶歸來  
亭倚鷗波送飛鵠鵠飛盡沒滄茫境衣上青天倒搖影  
鹿頭舫子湖州歌想帶南風覺淒冷冰盤瓜李進仲姬  
生絳畫就復題詩鄭虔三絕世無有於乎何幸再見至  
大三年時

戴良

題劉凝之騎牛圖

日落未落西山前誰家老翁牛背眠短身曲局聳兩肩  
山花插帽帽為偏左手拊牛右捉鞭牛行不動穩若船  
一童衝冷手握拳迎風鼓勢走欲先荒郊幕幕草纖纖  
云是匡廬古道邊匡廬山水好盤旋此日劉公初挂冠  
劉公作令天聖間民物熙熙德化宣世上浮榮直幾錢  
白髮東歸耕石田當時出處亦偶然乃留遺跡後人看

長安城中足豪賢車騎駢羅氣灼天一朝變滅如雲煙  
姓字寥寥若箇傳我觀劉公差獨賢

次韻春雪禁體

孫生讀書光映檐楊公滌筆色搖盃豈知今日物象新  
總向三春堆積滿著地都將委瑣藏拂池盡把瑕疵涴  
直愁芝菌埋沒平詎惜松篁摧挫短雜梅既無北使折  
穿楊那有東風管千達曉滑乍羞明萬瓦夜寒仍待伴  
村村掩土蟄迷戶處處壓林巢覆卵集遲固為入坎深

消早豈緣侵座暖世事已如鴻印爪我生方類鹿行瞳  
卧廬正慕焦寢安埽徑却嗟袁路斷何人無事杖堪尋  
誰家有酒門可款皓首書生自局東紫髯參軍每蕭散  
方晨致命許降臨未午催詩戒遲緩徐君可是常勝家  
白戰先陳漢庭袒陽春一曲古難和凍筆閣來敢辭嬾  
多少江山歸筆底巴陵三峽天所開遠勢似向岷峨來

題顧氏長江圖

天下幾人畫山水虎頭子孫世莫比何年寫此長江圖  
多少江山歸筆底巴陵三峽天所開遠勢似向岷峨來

洞庭蕭湘僅毫末楚客湘君安在哉江上一朝風雨急  
老我曾來踏舟立鼓枻既聞潭畔吟抱琴復聽竹間泣  
別來幾日世已非忽此披圖憶曩時早知避地多處所  
肯逐紅塵千里歸林下一夫巾履似亦有舟人與漁子  
能添野老煙波裏便與同生復同死

顧瑛

巫峽雲濤石屏志

謝家綠玉屏不琢龜甲形方若陟釐紙粉縹帶苔青秀

潔庚庚絕文理十二巫峰橫隱起芙蓉照影立亭亭遠落巴江一江水素湍洶湧綠濤長風吹雲白月高三峽濤聲滿人耳箇中獨欠孤猿號胡僧謾有金壺汁洒向素縵圖不得女媧煉石作五彩點染料應無此色此石產景由天工略假石人磨削功石色欲盡玉色起汎沈天碧涵清空君不聞大食貢石瑩如玉中有奇松四時綠六月涼風捲翠濤瑟瑟秋聲戰空屋又不聞楊家古屏刻水精中有為雲之美人海綃衣裳為煙霧姓名

自語非真真二物化去固已久價重隋珠難再有君家  
玉屏獨在世勿落忍人豪奪手我聞故人楊鐵仙束帶  
拜之如米顛起來發狂捉鐵筆醉墨寫入青瑤鐫何日  
乘舟上魚復喚取巴童唱巴曲更借丹丘粉墨屏對按  
巫山真面目余嘗往震澤間松陵謝氏伯仲賢而好事  
而余水仙之舟未得一造其所今高君叔  
彬攜此卷至別業求題且知楊鐵崖亦到湖上由是益  
知其賢而好事故製長詩一篇寄題寶屏他日或飲君  
薔薇花下幸出此為張本云至正乙巳七月

廿一日金粟道人顧阿瑛書於合溪別業

## 棲雲軒

春雲壓簾飛不起暖氣龍蕙百餘里桃花亭亭笑酣春  
谿邊浣花染谿水武陵才人碧窓底青霓衣裳白霞裏  
翠煙黑染猩猩毛冰綃凝文露華洗山光入眼青青迷  
小鳥向人啼復啼前村後村樹如蓋柳花起舞廻風低  
雲師雨師浩無據驅雲勞勞向何處請君勸師一杯酒  
更借白雲檐下住

釣月軒分題

并序

至正十年七月初五日琦龍門過玉山留數日將

泛蘭陵之舟而未果十二日起文高先生雨中見

過復留周旋是日飲酒釣月軒中秋暑乍退雨止

復作龍門琦以舊雨不來今雨來分題余得舊字

秋暑困人如中酒涼雨淒風忽相逗堦下決明花正鮮

池上芙蕖香欲瘦山人欲歸不得歸西夏郎官却相候

當軒不復問寒溫羣口誇詩如健鬪秋娘起拂紅綃袖

素壁看題今已舊舊雨不來今雨來故交那在新交右  
坐聽飛溜落虛簷似與冰絃聲合奏清歡聊欲紀文字

長席還當陳俎豆人生有酒不為樂何異飛蚊聚昏晝

玉山醉倒嵇叔夜紫芝光浮元德秀君今此行良不苟  
請君一觴為君壽風簾官燭暗秋屏歸期已在黃昏後

碧梧翠竹堂以暗水流花徑春星帶草堂分韻

得星字

高堂梧與竹颸颸排空青涼颺忽飛來落我生色屏為  
君燕坐列綺席吳歌趙舞雙娉婷尊香翠縷雪齒齒蔗  
漿玉盃冰泠泠人生良會不可遇况復聚散如浮萍分

明感此眼前事鬢邊白髮皆星星華亭夜鶴怨明月何  
如荷鉏隨劉伶中山有酒十日醉汨羅羈人千古醒蒲  
萄酒玻瓈瓶可以駐君之色延君齡脫吾帽忘我形美  
人聽我重丁寧更借白玉手進酒且莫停酒中之趣通  
仙靈玉笙吹月聲瓏玲與爾同躡雙鳳翎

以凍合玉樓寒起粟分韻得凍字

積雪未消春意動千里登臨遊目縱月明初度影娥池  
曙色稍侵鳴玉洞佳人象管怯初寒銀瓶梅萼猶含凍

白髮休嫌舞袖長張燈夜促飛觴送

漁莊以解釣鱸魚有幾人平聲字分韻得人字

芙蓉始花秋水新小莊落日酒相親漁童樵青解歌舞  
茶竈筆牀隨主賓龍門山人碧玉塵會稽外史白綸巾  
尊羨鱸鯰我所愛吟對西風懷遠人

以玉山亭館分題得金粟影

飛軒下瞰芙蓉渚檻下幽花月中吐天氣寂寂吹古香  
清露泠泠濕秋圃雲梯萬丈手可攀居然夢落清虛府

庭中擣藥玉兔愁樹下乘鸞素娥舞瓊樓玉殿千娉婷  
中有癯仙淡眉宇問我西湖舊風月何似東華軟塵土  
寒光倒落影娥池的皎明珠承翠羽但見山河影動搖  
獨有清輝照今古覺來作詩思茫然金粟霏霏下如雨

錢謝子蘭分韻詩并序

至正戊戌秋九月毘陵謝君子蘭過玉山中謂予  
言曰僕旅寓合塘之上今年夏秋苦霪雨田皆白  
波與陂湖相通所居復卑下老妻稚子不遑寧處

兼乏樵蘇之所今於泗川里得屋一區主于友人  
管伯齡其里亢爽宜禾麥予乃攜硯田而就耕焉  
故來言別予遂置酒於書畫舫邀恢公復初袁君  
子英陸君元祥朱君伯盛以江東日暮雲分韻同  
餞余得東字子蘭得江字亦賦詩留別餘字各有  
所屬云

先生祖實康樂公於今為庶稱老翁派流白鶴溪上住  
鄉里羣豪趨下風叩門過我驚我儂頭戴笠子心忡忡

談空說有丘壑志抗塵走俗山澤容自言千里竄荆棘  
此身飄泊如飛蓬山妻未老髮半禿紉鍼主饋全婦功  
大兒學詩次學禮小兒五尺儒門童前年去年兵散野  
單堠雙堠人舉烽孤舟如葉載雨雪朝浮暮泛西復東  
寒蠅穴窓死鑽紙泥龜曳尾生脫筒只今僦屋在美里  
黍穂雨黑波搖空米如買珠薪束桂壞壁四立鳴哀蛩  
杜陵遷居憂國難阮籍命駕嗟途窮鷁鷁無枝何所寄  
烏鵲三匝將奚從結心泗川得管子為借一畝幽人宮

我為斯文雅識面遲遲細語傾深衷我開船屋秋水中  
綠波碧樹紅芙蓉推窓面面遠山入引釣箇箇遊魚逢  
好事獨許米老得清賞當與岑參同畫張神筆駭瘞鬼  
書著芸香辟蠹蟲槽頭夜滴百斛酒佳菊爛發花叢叢  
蟹研兩螯白雪滿橘摘並蒂黃金重薦君之酒餞君別  
莫辭大酌玻瓈鍾君不見繞屋水流流入松五湖四海  
三江通君歸只在泗川上百里那消風一蓬君好去莫  
匆匆足衣足食可禦冬回首虹光貫明月新詩多附高

飛鴻

送周仕宣南臺典史分題得芙蓉堂

芙蓉並開開滿堂  
堂中美人傾玉觴  
畫船鼓吹奏白日  
迴風驚起雙鴛鴦  
鴛鴦雙飛出城去  
城上花開知幾度  
不聞嬌燕語雕梁  
惟有棲烏啼碧樹  
空城夜夜明月光  
照見烏臺臺上霜  
翠幕芙蓉大如斗  
盈盈綠水明新妝  
鍾山蜿蜒若龍走  
送子春江一壺酒  
他時戴花歸故鄉  
莫忘江頭折楊柳

雪霽與鄭九成陳惟允坐劒池上惟允為寫圖

因次九成韻

飲澗長虹挂深嶺千尺轆轤斷脩梗夜寒月黑鬼賦詩  
白日清風人寫影藤蘿陰陰蔓山椒長松落雪如花飄  
煩君畫我掩書卧窓前更著青芭蕉

次周履道韻

夜泊石湖湖水傍芙蓉露白蒹葭蒼晝船酒行飛急觴  
美人羅袖隨風揚長檠翠幕高高張浩歌起坐秋夜涼

明月已在天中央大星小星光煌煌酒酣不記過船去  
但聽秋聲響疎雨夢中化作蝴蝶飛飛入花間聽春語  
鄰鷄喔喔東方曙船尾浪花風起舞為君起和夢中詩  
水氣如煙度秋渚

倪瓈

送呂養浩之紹興

賀監宅前路荷花今亦無空餘湖上月照見水中蒲送  
爾作官幽絕處錢塘江頭飛柳絮聽事臨隈滿夕嵐時

有沙鷗自來去

送徐君玉

閩江之水清漣漪隔江名園多荔枝  
閩中女兒天下白  
越波飛漿逐鳬鷺櫂歌清綿洲渚闊  
蕩漿落日令人悲  
蠻煙怪雨忽冥密蔣芽蒲葉相參差  
此中勝事不為少  
徐郎遠遊牽我思

劉君元暉八月十四日邀余翫月快雪齋中命

余詩因賦

卷簾見月形神清疑是山陰夜雪明長歌欲覓剡溪戴  
悵然停杯遠恨生爾營茅齋名快雪邀我吹笙美明月  
明星如銀浮翳消垂露成帷桂花發酒波蕩漾天河傾  
笙聲嫋嫋秋風咽古人與我不並世鶴思鷗情迴愁絕  
為曹僉事畫溪山春曉圖因題

荆溪之水清漣漪溪上晴嵐紫翠圍連舸載書烟渚泊  
提壺入林春蕨肥身遠雲霄作幽夢手栽花竹映山扉  
磯頭雪影多鷗鷺也著狂夫一浣衣

李徵君將還揚州因言沈郎官在吳下賦此以  
寄

二月桃花始花淮南客還家階前疎雨落堂上春衣薄為  
言沈約在吳中玉壺青絲酒如空春風相過蕙草綠芳  
菲滿堂樂未終

鄭韶

題廬山圖

羣山東南橫翠色倒影芙蓉生石壁青山直下九江流

吹落銀河二千尺安得浮雲滿春空託身萬里之長風  
南遊濯髮洞庭水卧看蘿月行山中

小隱為居延王孫德新賦

草堂三日風雨驚閉門不聞車馬聲書簽頗怪燕泥濕  
井屋忽看春草生王孫亦在城西住手種團團青桂樹  
朝來讀書不下堂自寫淮南小山賦

送廣德程萬戶弟從軍

桓桓程將軍年未三十氣如雲一朝詣闕襲父職獻書

討賊爭功勳朝廷恩深禮數厚授銳前驅那敢後雲鳥  
天青沒畫旗轅門月黑鳴刁斗將軍有弟才且賢從兄  
萬里何翩翩看雲倏爾歸奉母如此一門忠孝全楊花  
三月潼川暮揮戈又指湖南去吹笛高城破曉風飲馬  
長江洗兵雨學書學劍真男兒功名拾芥須爾為長歌  
更勸一杯酒歸來細頌平蠻詩

分題得柳塘春

美人遠在春塘住門外垂楊千萬樹微風白日裊遊絲

度水輕陰蕩飛絮使君來自白玉堂攀條欲結雙明璫  
門前繫著紫駟馬上堂急管絃清商美人起舞為君壽  
再拜登歌酌君酒使君明日上長安莫唱東風折楊柳

碧梧翠竹堂

去年種桐樹綠葉高雲涼今年種新竹已與梧樹長幽  
人讀書坐高堂夜聞天籟鳴笙簧下堂仰視明月光照  
見烏啼金井傍烏啼在何處雙飛向桐樹枝頭啞啞傳  
好語明年結巢鳳來住

柳塘春

春塘二月春波深楊柳濯濯美輕陰微風裊裊金蟲落  
隔屋兩兩黃鸝吟飛花莫遣度流水化作浮萍無定止  
折時須折最長條隄邊繫取木蘭橈

雪霽顧仲瑛偕余與陳惟允坐劒池上惟允為  
寫圖因賦詩云

殘雪落林度西嶺古澗寒泉凝素綆孤僧倚樹聽微吟  
一鶴臨池照清影松間旭日映山椒白雲英英如雨飄

何當為置王摩詰更添幾葉紅芭蕉

題趙仲穆臨李伯時鳳頭驄圖

蓬萊宮中春晝遲五馬曾閱李伯時天閑一一盡龍種  
獨愛鳳頭尤崛奇王孫歸卧江南日見之為爾生顏色  
乃知神駿世所憐彷彿明窓親貌得黃頭圉官頤且願  
絳袍烏帶高帽尖是日牽來赤墀下黃門辟易爭觀瞻  
紅絲絡頭尾窣地玄雲滿身飛不起長鳴知是戀九重  
豈但一日行千里君不見春風立仗何駒駒龍文照地

來房星何當中道為剪拂縱目平原春草青

姚文奐

題玉山佳處

玉山之堂湖水東朝來佳氣鬱葱龍鶴飛瓊圃三珠樹  
鼈戴昆侖小朵峰雨裏買魚溪友過花間吹笛野人逢  
朝簪儻擲歸相候一箇桃枝瘦竹筇

周砥

題滄州詩卷後

騎鯨東海上豁然形神清仰看中天月逍遙吹玉笙凌  
晨歸返三山住銀闕珠宮渺煙霧東風吹亂碧桃花化  
作紅雲渡波去

送李生北上

李生東吳人住在東吳市手持賈誼書去謁漢天子天  
子白玉闕虎豹守九關黃金爛初日照耀蓬萊山願為  
丹穴鳳飛入五雲間莫學襄陽孟夫子誦詩玉堂空放  
還勸爾一杯酒與爾作離別西風吹折楊柳枝八月燕

山夜飛雪君當挂席大河去我還拂袖東山岑閉門自  
掃石上月綠蘿樹底彈鳴琴

新郭

汎舟越來溪水旁溪邊暮色何蒼蒼主人張筵揮羽觴  
吳姬唱歌聲抑揚船尾挑燈大魚出船頭洗鱗秋波涼  
夜如何其夜未央萬壑不起星煌煌酒闌客過別船去  
木葉蕭蕭下如雨船中醉卧忘西東睡覺猶聞夢中語  
此時月落天將曙隔屋鷄啼欲起舞西風滿天鴻雁聲

瑟瑟菰蒲響秋渚

春日

空山寂寂行人稀  
岡頭落花如雨飛  
罷琴惆悵不能已  
故鄉寥落何當歸  
南去百粵羽書急  
北來三吳戎馬肥  
安得龍驤擁戰艦  
埽除俘寇揚軍威

遊龍巖三洞之間

商顏紫芝久不採  
淮南丹書竟安在  
仙人勸我三洞遊  
身如騎龍到東海  
海氣茫茫雲霧廻  
白波捲雪連山來

雙童手秉海底日紅光一道金蓮開瑤草綠可折瓊樹  
花冥冥昔人煉丹丹竈在錦苔繡石光清熒雷行半空  
中逢逢擊天鼓玉女鸞笙時下來前頭四足神魚舞醉  
拂珊瑚鞭玉虎我欲因之窮洞府聞訪八公五雲裏為  
說蒼生受辛苦不然飛出西華巔太極總仙之洞天安  
得周廻更二千直與龍巖之洞相鈎連蓮花峰上重攜  
手笑攬霞觴窺八埏

黃玠

題郭鳴倣朱老雲山圖

門外馬蹄三尺塵屋底青山看白雲不知身世在城市  
但覺爽氣吹冠巾鴨觜灘頭露沙渚彷彿西陵與南浦  
惱人歸興滿江東煙樹半沉天欲雨

文質

和白雲海

白雲深白雲深白雲深處元無心眼空瑤海一萬里山  
光不動秋陰陰虛白盈盈啓局牖袖拂天開落星斗盡

隨玉氣化為龍不逐西風變蒼狗道人高居白雲裏九  
重丹書徵不起三生石上話因緣春夢梨花隔秋水風  
塵慘日橫干戈龍吞虎噬奈爾何斷蛇神器未出匣海  
寓無復春光和世事紛紛如落絮百歲流光水東注白  
雲與我有深期我亦相依白雲住

黃文德

贈錢洞雲

玉峰古洞多白雲中有學道癯仙人問言盡日說空有

一朝興入廬山春香爐峰高虎溪遠石上秋深長苔蘚  
白蓮不老秋月明萬里浮雲自舒卷

華翥

以玉山亭館分題得玉山佳處

我聞玉山最佳處翠竹高梧夾行路陰陰石洞響流泉  
歷歷青山隔春霧草堂窈窕煙水西楊柳漠漠鳴黃鸝  
花間委珮仙客集水上清唱漁舟迷巖頭桂子飄金屑  
石上芝雲白於雪何曾夢入小遊仙長夜持竿釣明月

玉堂學士天上来相逢一笑華筵開千鍾綠酒金莖瀉  
五色新詩雲錦裁美人高歌醉擊筑下堂送客燒銀燭  
明朝廻首望仙槎月出金盤照華屋

王鑑

喬宜中邀看杏花再和宜中劉禹疇韻

朱闌曲徑春光好一樹杏花開獨早枝頭無處着風流  
時有幽香暗相惱畫堂簾影畫婆娑佇着嬌姿紅映縞  
芳心欲吐半含羞脉脉春愁倩誰掃飛來翠鳥更多情

斜立花枝如畫橐主人留客客盡歡暢飲高歌各傾倒

明朝廻首綠陰濃惆悵殘紅藉芳草

余日強

奉同鐵笛相公賦王粲登樓圖

建安文章應劉陳通悅亦有王公孫長安西行白日匿  
漢陽人依劉俊君漢陽偷安無遠畧王孫坐覺荊州窄  
英雄固當擇所歸作掾終慙座上客北風蕭蕭吹素心  
北望杳隔荆山岑魏官牽車出關遠銅華蝕風驚春深

秋來滿眼生禾黍江山重感非吾土憑軒作賦抑何心  
猶是黃初非典午君不見當時奴視賣履翁矯矯文舉  
真如龍

陸景龍

雪溪翁山居圖

山林之幽樂且閑何人卜居雲半間草樓高出蒼樹杪  
石梁斜壓清溪灣循溪隱隱穿細路斷岸疎林接煙霧  
微茫萬頃白連天雁陣鳬羣落無數樵歌初斷漁唱幽

沙頭人卧竹葉舟青山數點西日下渺渺一片江南秋  
我昔苕溪問清隱溪上分明如此景別來時或枉夢思  
忽見此圖為心醒錢翁少年善丹青晚歲筆意含英靈  
興來漫臨北苑畫妙入毫末窮杳冥無聲詩與有聲畫  
翁能兼之奪造化詞林諸老富品題一紙千金重光價  
應君持此索我詩愧乏瓊玖答贈之臨風展玩三太息  
寧不為動尊鱸思我今借屋湖山裏恍惚風煙無乃似  
擬將三尺白剡藤試煩東鄰雪蓬子

雪蓬陳元昭號

邾經

為張藻仲題高文璧畫抱琴圖并序

至正乙巳歲二月未盡三日藻仲張君宣奉青衣  
相君命載酒訪余華亭以三月始禁酤乃留縱飲  
上已日抵余草堂過高文璧翼日高君寫抱琴圖  
以贈藻仲余為賦詩

聽鶴亭前春澹沱宿雨猶含百花妥已愁三月酒船空  
宣也抱琴能覓我為言來自青衣洞載得官醪滿書舸

青衣仙人期遠遊紫鸞將車尚虛左老夫久矣厭芻豢  
從之欲乞丹砂顆孰云仙珮不可攀洞天茫茫雲久鎖  
祇緣酷禁日以迫爾尊我罍視猶夥便須秉燭夜相繼  
過此將無生酒禍老夫自適無何鄉故不飲醇今亦頗  
阮宣杖頭每獨挂陶令紗巾不曾裹三泖平分碧玉壺  
九峯半落芙蓉朵從人拍手笑醉翁寫入新圖無不可  
何為高璧忘我形只畫張宣遺么麼宣也亦復頤而瘠  
畫作修髯知則那想當下筆天機精夢蝶軒中盤礴羸

不畫鄰甕吏部縛不圖醉鉢劉伶荷為寫抱琴山水間  
意者於吾猶未果璧也山林同此情自惜老夫身嬾惰  
宣乎豈是王門伶聊復塵中客裾控朱絃清廟爾當薦  
金馬朝登夕青瑣百年禮樂崩且壞誰其興諸悲堦軻  
鍾期伯牙寧復遭餘子眼中螟與蠃高君宿昔號酒狂  
過肆相牽傾白墮自經喪亂賴酒活今則禁之何蟹保  
便攜張生入山去石上彈琴松下坐松肪釀熟中山醪  
商顏采芝當蔬蓏生不我留呼酒查望入雲漢星侈侈

莫過牽牛談世事但恐笑人如鰲跛吾嗟高君真不凡  
遊戲丹青出兵火後天有約最尋真可能同鼓蓬萊柁

舒頤

竹谿書室圖為黃克文題

清谿谿上竹無數愛竹移家竹林住階前老竹鏗玉聲  
秋夜讀書霑竹露書聲繞屋雜竹聲竹色侵書助書趣  
竹根箇箇長龍孫竹上鸞皇亦來聚有時攜琴倚竹彈  
兩袖清陰分竹翠雲梢月榦竹美影杖竹尋詩過橋去

平生性癖亦愛竹不問主人造竹所君不見一筇投陂  
忽變化萬卷蟠胸勝插架

題海寧吳筠軒山水窠木卷

世間名士多愛竹為愛扶疎伴幽獨虛心直節傲雪霜  
盡日相看看不足松蘿山下延陵裔自號筠軒詠淇澳  
明窓淨几泚霜毫煖日晴風美蒼玉有時乘興寫山水  
復貌時人真面目一丘一壑胸次奇萬貌萬形心匠蓄  
瀟瀟灑灑聲秋軒瑟瑟琅琅撼屋我家昔寓湘江濱

此君與我情最親別來廿載世離亂蹤跡萍梗無音塵  
適與筠軒偶相見一笑袖拂松蘿昏怡然贈我一幅畫  
滄江萬頃波粼粼遠岫雲開虎嘯月疎林霜落鴻來賓  
抱琴疑是林和靖谷口又類鄭子真扁舟蕩漾空閨際  
蘆花兩岸紛纘繽感子高情寫幽趣世無管鮑行蹟蹟  
明朝漁翁約我度谿曲彷彿又似桃源人

許子仁相招山中叙話

許君邀我來山中我來但見堂戶空主人送客過谿去

風吹兩岸花濛濛屋後萬疊金芙蓉紫氣夜吐仙人宮  
澗泉流香過白鹿林木挂雨拖青虹羨君築室讀其下  
迢遙不與世俗通一聲黃鳥破幽夢四顧空牖俱玲瓏  
我愛此地無暑氣重來飽飯談仙蹤

雨

黑雲壓天殷其雷白雨如注西南來於時我方高枕卧  
池上菡萏花初開從渠雷昏與霧暗推起蓬窓時一看  
頃刻陰霾盡掃除幸免衝隄及破岸天風不來如鏡平

一輪明月海底生

送莘鄉丘克明

楊柳磯燕子飛江西倦客江東歸蘆芽出水鰣魚肥君  
今歸去是邪非聞君疾未相識漫浪贈言恐無益新豐  
斗酒何日逢人生意氣無南北喜津津去宜春鶯花滿  
路娛歸人君不見都門冠蓋都憂惱挂杖故園風日好

舒遜

重九日

去年登高靈山巔新詩醉寫秋風前金杯酒泛紫萸滑

烏紗帽插黃花偏今年瀟瀟坐風雨回首往事心茫然

青山當戶為故友白髮兄弟羅酒筵丹楓染霜明秋色

白雁呌雲橫暮天醉窮老眼浩無際賸欲乘風遊八埏

題秋江圖為黃友仁賦

老樹槎牙石龍縱隔岸人家紫煙重長江蒼茫日夜浮  
天慙西來雲影動駕風上水誰家船片帆高颺孤雲邊  
林下伊誰襯襪子抱琴應訪草堂仙毫端遠勢莫與比

巴陵洞庭秋色裏莫是當年顧虎頭寫出滄洲千萬里

周霆震

喜雪

并序

庚子臘月初旬雪再作十九日大雪至二十一日  
彌甚深可數尺三日乃止辛丑元日蚤起雪塞門  
十三日夜半又雪皆平地尺深喜而賦之

殘年新春凍不開大雪五度漫空來南州病熱已十載  
造化有此真奇哉夜聞朔風撼天柱恍惚萬馬隨奔雷

乾坤正氣有先至密運亭毒茲其媒雲旗乍飄搖若水  
濤霜却卷飛龍堆女媧廢煉深縮手河伯失據俄驚厔  
元冥振轡祝融遁怒勢欲遣昆岡摧卧龍潛蛟起奔走  
舞鶴翔鳳爭徘徊瑤池觴罷酒餘瀝漢臯相贈投瓊瑰  
蒼山一夕頭盡白貧戶得句侵晨推朱門豈必異衡宇  
埋沒弱柳餘枯梅我疑真宰偶戲劇往往玩世如嬰孩  
故將空色種天上大巧六出無根荄要令六合反混沌  
寧許萬象蒙塵埃兆豐呈瑞悉餘事解后淨洗昆明灰

西流壺嶠應自反咫尺清淺移蓬萊內廷稱賀論邊事

坐想敕使傳宣催蔡州鶩池久安堵整頓宇宙須雄才  
涓人自昔負高見遠去求馬何時回燕山從爾深一丈  
埽地為築黃金臺

朱希晦

客邸中秋對月

去年中秋秋月圓浩歌對酒清無眠煙霏滅盡人境寂  
仰看明月懸中天今年客裏中秋月靜浥金波更清絕

可憐有月客無酒不照歡娛照離別衣闌淅浙西風涼  
月中老桂吹天香悠然長嘯動歸興坐久零露沾衣裳  
浮世悲歡何足數庾樓赤壁俱塵土風流已往明月來  
山色江聲自今古

簡子文林訓導

東風落盡辛夷花遙憶美人天一涯美人久別音信杳  
想見只今霜鬢華山房幽深市囂遠白日枕書眠碧霞  
崖高瀑布灑晴雪淨筅石鼎烹春茶平生青紫不挂眼

榮名絆人安足誇  
當年我來訪遺跡  
拄杖看雲著雙屐  
玉簫吹斷鳳不來  
但見千峰倚天碧  
臺前日夜溪水流  
金星光動溪中石  
脫身擬欲恣幽棲  
坐占瓊臺煉金液  
衰年悞墮塵網中  
齒豁頭童竟何益

吳哲

過裏洋河

裏洋河何湯湯  
奔流百折到瀧岡  
砂礫灣灣里路長  
船頭照見落日黃  
愁雲低沒雙鳬翔  
牆烏孤征心徊徨  
遙

空半作明月光涼風忽來吹我裳荻花夜白含清霜裏

洋河思故鄉

鄭洪

題春江送別圖

西陵渡口山日出蘆芽青青柳枝碧龕山赭山潮東來  
黃郎刺船水如席勸君勸君遲渡江柳條貫魚賴尾雙  
治魚沽酒待明月人生莫作輕離別

題張士厚四時士女四首

繡簾壓地花陰陰鳳釵綰雙黃金飛絲千尺不墮地  
絕似江南遊子心寶匱百刻煙如縷暗擲金錢卜神女  
櫻桃子熟人未歸鹿蕙花開淚如雨

金盆沐曉蟠雙鴉綠紅粉汗霑蟬紗金刀取玉薄於紙  
渴心欲死東陵瓜木蘭艇子沙棠楫采蓮得花棄荷葉  
荷葉輕如薄倖兒蓮花酷似多情妾

梧桐月小蟾蜍蟄芙蓉露冷銅山泣金粟香懸十二闋  
鞶羅塵沁莓苔涵畫屏絳燭煙未消夜深恨殺雙鸞簫

喚回金屋鴛鴦夢不到銀河烏鵲橋

霜蟾美影窺金屋么鳳吹香絢銀燭繡羅小穢處雙蓮  
翠袖垂肩倚孤竹紅綿凍折水如車寒衣遞到長風沙  
莫遣朝雲妬桃葉寄將春信與梅花

徐淮

偕劉景玉周元浩攜小妓遊於坡上忘形劇飲  
故賦此

馬如遊龍車如水劉郎周郎玉相倚柔風暖日故蒸春

紫燕黃鸝自相語先生染筆寫烏絲美人持杯唱金縷  
醉來為愛落花多急掃蒼苔坐紅雨

葉顥

登九龍山訪孝標遺跡月下飲酒

杖藜扶我登九龍輕鞍短袂隨天風九龍飛去幾千載  
雲間秋老青山空孝標先生骨應朽清名與山同始終  
荒煙衰草迷古洞惟有皎皎栖青楓酒邊半醉美明月  
月光忽落杯酒中舉杯歡笑和月吸清光散入胸次照

我突兀磊砢之孤衷平生所蘊剛毅氣洞然明白無隱容信知古人嗜好不在酒愛其果能助發英銳之志醞釀麴蘖之奇功興懷不盡下山去明月又在天南東

金華尉趙德夫祈雨有感

陽烏赫赫明高穹火雲不雨天西東晴波渴飲千丈虹嘉穀槁死生蟲蟲金華趙宰亦憫農陳詞涕泣呼天公食天之祿因農功視農不救寧為忠下人無罪天所容願以斯責歸微躬志誠直通龍伯宮須臾遣出雙玉龍

利爪排空怒且雄阿香推車海若從鞭雲駕雨隨天風  
下與世人為年豐要令飢旅顏回童少焉雲散天宇空  
神龍却歸潭水中廟閑山空鼓鼃鼃

春雪

百花憔悴東風寒六花爛漫開正繁東君似欲誇富貴  
瓊臺玉榭真珠闌綠楊無力晴拋絮青松不老雲生樹  
貪觀天女跨鸞歸失却仙人騎鶴處斜斜整整復霏霏  
却憶銜枚入蔡圍奇功未立英雄老壯志雖存氣力衰

酒酣舞劒情難歇指點銀瓶莫教竭醉中猶自憶當時  
鵝鴨城邊一池月

劉養晦

王氏招飲席中有感

憶昔至正全盛時朱門豪家多亭池池邊女兒縱遊賞  
新妝照水明玻瓈春風淡挹芙蓉渠黃鸝嬌轉垂楊枝  
整日歡聲無暫歇攜手花間撲蝴蝶曉吹龍管迎香風  
晚酌金罍邀夜月珠簾繡幕花氍毹畫閣朱樓紅地爐

日長無事教鸚鵡象牙鏤馬閑擣蒲  
宣知人事忽更變  
瓦礫荒蕪人不見繁華一去杳難留空有閑花飛片片  
君起舞我當歌玉堂夜夜容鳴珂人生在世若大夢吁  
嗟易老成蹉跎青春去矣難再過美人如花不長好黃  
金白璧徒云多

郭鈺

題郭伯澄西崦山居

白日上東山晴光射西崦西崦山人開曉闢一襟煖翠

濃如染門前流水玉虹明樹上啼鶯金羽輕自埽落花  
客初到共題脩竹詩先成十載戰塵迷道路西崦只今  
成久住移竹春深長子孫種梅晚歲為賓主丈夫揚眉  
天地間山林朝市俱等閑出為公卿入為士古人高節  
非難攀聞君近年深閑戶烏帽青燈讀書苦劖寒新淬  
冰雪光松老終無棟梁具西崦山深竹徑微我來欲共  
薜蘿衣一朝富貴逼君去燕雀空羨冥鴻飛

貽郭恒

月懸松露明鶯啼浦煙破遙想山中人此時正思我我  
行忽墮滄江邊度盡春風無一錢向來自是釣鰲客至  
今思拍洪崖肩洪崖不可招蓬萊在何處鋪遍閑愁芳  
草路千樹綠陰晝如雨錦字書成人不來銀燭花殘誰  
與度近日聞君多好懷雪色白紵佳人裁小樓紈扇低  
徘徊釀酒好近榴花開榴花開我歸來

黃氏容安樓

君家高樓高百尺樓間把酒無虛日極目欲窮千里心

誰謂區區僅容膝  
卷簾半空雲氣入  
孤鶴長鳴楚天碧  
醉拍闌干呼月來  
萬壑松風夜吹笛  
天上玉京十二樓  
羣仙不帶人間愁  
曉飛霞佩來相訪  
攜我共作丹丘遊  
今日之日君我留  
為君題詩樓上頭  
笑指樓前大江水  
古今人物共風流

賦清溪

清溪之水抱幽谷  
盤渦細浪相廻蹙  
半篙晴日蕩金鱗  
一帶秋煙溜寒玉  
溪上仙翁絕塵俗  
開門俯溪飲溪綠

白鳥飛來明鏡中垂楊鎖斷閑干曲窈窕春花亞修竹  
修竹何人共棊局紫蘿為蓋草為褥如輞川圖懸一幅  
嗟我早年厭羈束五湖風月醉心目祇今は處沸鯨波  
把釣從君事亦足

滄洲灌夫詩為周子諒賦

往來曾踏滄洲路滄洲仙人留我住紫霞裁剪成春衣  
到今挂在珊瑚樹十載人間走塵霧惟愛周郎讀書處  
雲氣寒深連竹松江波晴漲搖窓戶清曉中庭遺鶴羽

太乙青藜夜相語晚菘春韭東西畦鳥啼桑陰日當午  
浦雲分送疎疎雨抱甕歸來不知苦嗟我已負滄洲期  
羨君獨得滄洲趣江山今古武陵源姓名伯仲蘇公圃  
畦外有田多種黍長使糟床壓香醑招隱先須招我來  
到門不用分賓主

桐江宴集和周子諒韻

岸巾長嘯吾與君讓君筆力飛春雲蒹葭枯折吳江漬  
芝蘭却許濃香熏今夕何夕歌聲聞江山重到吾已老

慙愧詩成瘦如島坐中少年美詞藻琪樹交花照晴昊  
懷抱一時盡傾倒玉瓶行酒杯如飛爭雄得雋酒滿衣  
持觥御史令莫違研魚烹雁願指揮荊州吾土還相依  
江上雲荒月欲爛客囊空貯閑愁滿不謂相逢重展轉  
交情豈必論深淺黃鶴一飛天地遠

題蕭質所藏終南雪霽圖

玉龍銜燭晴光吐怪底空檐響殘雨南山一夜服還丹  
滄浪之麌總如故公子昨朝愁出戶錦袍圍春醉歌舞

赤脚老樵拾斷薪  
畫史何由得深趣  
早梅回煖動精神  
凍雀翻叢動毛羽  
筆端生意開  
紈素恍然不計寒宵苦  
泥滑迢迢江上路  
行客茅檐不少住  
世間捷徑渺何許  
已有扁舟候江滸  
隔浦長橋似灞陵  
何如著我騎驢去  
黑貂擁醉詩思多  
明日歸來為君賦

劉永之

為潘仲暉題定使君所贈馬郎中畫鶴

郎中畫鶴稱第一  
江海十年多見之  
蘭臯明月照獨舞

雪影參差風倒吹蒼江元圃三山上琪樹金芝日應長  
萬里懷歸惜羽毛中宵怨別流孤響通泉素碧久漂零  
忽見新圖百感并華亭舊歎傷心切赤壁扁舟入夢驚  
綠錦池邊飼秋雨驃騎多情每同賦相思欲報故人知  
為傳一札東飛去

田園幽隱圖

我家清江縣城北竹梁花埭環深宅鄰屋分燈夜讀書  
仙山借鹿春耕石蹤跡年來逐轉蓬萬事驚心舊業空

無錢買山惟愛畫坐對新圖如夢中柴門茂樹森相向  
野水山橋接空曠雨足沙田野犢閒風回茅屋晨鷄唱  
隔林炊黍起新煙接竹穿蘿引澗泉傍隄榆柳皆新種  
近舍柘枝不記年山深住久疎城府人情頗訝今非古  
酒熟頻開白社尊家貧時賣黃公履邇者中原相犄角  
錦袍白馬相馳逐得失俱隨去水流至今猶記王官谷

劉宗海為余作清江春雨碧嶂秋嵐二圖賦此

贈之

劉君早年善山水得意往往圖樵漁西昌城西一相見  
忽然贈我雙畫圖圖中似是清江曲春雨蒼茫汀樹綠  
煙中髣髴辨飛帆水際依微見茅屋漁郎繫船江石上  
一夜磯頭水新長孤村日暮煙火微渡口歸人暝猶往  
碧嶂層巒翠轉奇嵐光秀色含朝暉風林落葉洒青壁  
雲壑流泉生翠微我昔結廬此山裏每愛秋嵐淨如洗  
經年奔走厭風塵偶看新圖心獨喜憑君添我小綸巾  
明當歸掃山中雲他日君來一相訪松根為子開柴門

題傅商翁觀松瀑圖

山風蕭蕭晝寂歷長松落落倚絕壁紫煙乍留青嶂中  
瀑布迸落蒼厓石山中之人形骨清幅巾藜杖時獨行  
溪回陡絕去無路坐撫瑤琴摸劒聲我亦平生慕真賞  
十年誤落江湖上故山蕭條久不歸夜雨秋衾夢常往  
人生適意無是非雲林久與幽人期九節預裁青竹杖  
明朝試拂薜蘿衣

送羅與敬歸西昌

石龍磯畔多芳草遊子憶家春已老水北楊花撲地飛  
旁人謾道飛花好愛子不忍別送子到水瀆清天孤影  
飛黃鵠落日長風吹斷雲朝發銅塘津暮宿青泥渡帆  
過孝通祠漸是西昌路金魚洲遠樹青青三顧浮煙生  
杳冥石扶壞道通高閣水齧危沙見古城君家正在何  
方住獨有園廬俯江渚昨夜深閨夢遠人相思定倚櫻  
桃樹

醉贈何能舉

與子十年不相遇  
豈意今日重逢君  
狂歌痛飲自我輩  
世間俗子徒紛紛  
林木蕭疎濕秋雨  
蹇驢嬾渡溪橋水  
咫尺西風隔白雲  
羣仙環珮月中聞  
重陽好約冰壺子  
同入仙源避世人

御選元詩卷三十二

謹案第十四頁前五行玉笙吹月聲瓊玲按顧瑛

玉山璞橐瓊玲作泠泠今仍刊本

欽定四庫全書





總校官庶吉士臣侍朝  
校對官檢討臣蕭九成  
謄錄監生臣周元

欽定四庫全書叢書要

集部

御選元詩卷三十三

群校官原任主事臣李斯咏

欽定四庫全書

御選元詩卷一萬八千四百四十五

集部

御選元詩卷三十三

七言古詩十

貢性之

送盧思敏歸天台

天台山高四萬八千丈神仙之徒往往窟宅乎其間我  
嘗探奇恣玄覽直上絕壁窮躋攀松風流水聲瑟瑟桃  
花玉洞春漫漫曾逢兩仙人對奕猶未殘局移白髮長

披耳十二百歲如童顏手攜綠玉杖劒佩黃金環見我  
拂衣起念我行路難問我何從來延我啟重關授我長  
生訣餌我金霞丹餐松齧柏飲沆瀣伐毛洗髓滌肺肝  
吁嗟凡骨不易蛻失身又復歸塵寰始知神仙有術終  
不可以遽學使我夢寐至今夜夜空與相往還盧郎天  
台人縛屋天台下年少事遠遊仗劒歷中夏才華擅文  
藻富貴若土苴曳裾恥王門望雲念親舍浩然欲歸養  
即日具鞍馬上堂奉旨甘載拜獻杯掌適此舞綵歡勝

彼途路者父母見子歸喜氣揚雙眉親戚饋壺漿鄰里  
將豚雞慰藉遠歸人老幼咸熙熙但諳風俗淳不識亂  
與離因君重念山中好歸來已覺輸君早汨沒塵埃徒  
我慙顛頓形容漸枯槁今君往矣誠難留殷勤為謝羣  
仙道明年二月春正繁期爾山中拾瑤草

題扇

鮫人夜織綃滿機并刀剪碎光陸離歸來斫斷珊瑚枝  
製就明月初圓時南洲溽暑醉如酒朝攜暮攜常在手

從此相親成狎友縱使分違應不久祝融峯頭重回首

題山農畫梅

大庾嶺頭春信早十月梅開照晴昊曾騎官馬隴頭來  
百里梅花夾馳道夫君元是嶺南人自言家近羅浮村  
種梅繞屋一萬樹玉為肌骨冰為魂得官遠向西湖住  
喜與林逋作賓主夢回酒醒霜月寒又見梅花在窓戶  
笑倩旁人為寫真相看如見嶺頭春一聲長笛月欲落  
腸斷梅花身後身

溪山小隱和胡虛白韻

我聞神仙之國伐毛兼洗髓遠在西海西邊蓬萊之弱水我生有夢不可到  
鬢鬚君家圖畫裏溪流冷浸玻璃天層巒疊嶂含雲煙渡頭楊柳綠如染洞口桃花紅欲然老夫已借過眉杖來聽松泉弄幽響雲中雞犬知幾家胡麻已熟雕胡掌此中此樂何紓餘赴隴無煩來鶴書便欲相從學耕釣細和山聲同水調

青山雲一塢圖

青山青青欲斷青山斷處雲如幔人家深住塢東頭剛  
被雲遮一多半山兮雲兮宵莫分雞犬遙隔雲中聞有  
時隨風或零亂長日與山相吐吞城中車馬多如織沒  
馬紅塵深幾尺只有富貴解留人直與雲山未曾識吁  
嗟山中人夢憶雲中君卷舒隨所適放浪由天真我昔  
西游登五老五老諸峰插晴昊酒酣放歌謫仙句擬共  
雲松結巢好江郎自是青雲姿按圖笑索雲山詩從來  
知爾出山去為雨為霖當及時

題息齋竹次韻

憶昔舟泊湘江時青天皓月流素輝美人騎龍上天去  
遊魂夜半招不歸興來一飲三百斛醉倒肯惜千金揮  
孤鸞隨影秋水碧鷓鴣呌入蒼雲飛涼颺颯似鳴籟  
翠霧漠漠如張幃胸中氣吐萬菡萏筆底勢走千明璣  
颺車搖搖渺何許疑是柱頭丁令威風流雲散世已遠  
蕭條遺墨人間稀眼前頗仰即千載底問誰亡復誰在  
我來見畫如見人往事悠悠付深慨挂之高堂素壁中

老氣凜凜迴長風狂歌起舞還自惜笑看白日行青空

宮梅圖

璫樓夜寒銀漏澀滿地霜華月光白翠禽啼斷夢中魂  
窈窕虛窗碧紗隔千門深鎖含章宮未許人間識春色  
只愁笛裏曲聲哀零落香鈿點粧額

丁鶴年

贈相者姜奉先

宋忠臣姜才之孫

德祐忠臣好孫子爛爛目光嚴電紫人間富貴等浮雲

瑣瑣何須挂脣齒  
灤灤瀨險蜀道難  
曳裾旁人多厚顏  
留取乾坤雙老眼  
夕陽牛背看青山

寄武昌南山白雲老人

姓衛字均執先人時故舊家居未嘗入城市間

鶴年辛苦遠還遣子弟問遺不絕鶴年足疾

日劇弗克往拜牀下謹奉拙詩少致謝忱云

故人家住南山下心與白雲共瀟灑芝草遙賡黃綺歌  
蓮花迎入宗雷社嗟予江海避風塵白首歸來失所親  
青眼相看如昔日只有南山與故人

鄭淵

東明山

君不見深裏之山青入天盪摩日月呼雲煙又不見仙  
華山高一千仞排空直立如旛旛二山雄削無與比降  
勢演迤直與東明連東明雖然一培塿林迴麓轉依平  
川喬松百尺不僵亦不死女蘿冉冉青絲懸綠光照人  
濃若酒角鬚儼似蛟龍然吟壇西頭竹千挺翠色倒浸  
梅花泉泉傍一沼水如鑑下有魚鱉潛深淵百禽紛紜  
競棲託欲借薈翳逃鷹鶴東方海色欲生白啁啁嘶嘶

春聲傳雖無律呂不可辨絕勝翠管并繁絃我先誅茅  
雜草結新屋軒檻疏敞蔓楹鮮犀籖瑤軸插滿架鄴侯  
三萬知誰賢聯衿接席兄與弟古今治亂時鑽研客來  
引座松石底一甌花乳浮輕圓夜深白月徑窺戶且把  
綠綺攬幽玄深林恐有山鬼聽吹燈遽就青檀眠世間  
遼絕有如此便覺眼底無嵩瀍我生如結泉石緣我生  
愛使煙霞纏白鹿耕雲不須牽五芝種得山前田金華  
先生今謫仙買山便可分一廛下勤不願食萬錢但得

清風明月供吟篇

烏延思敬

題李伯時三馬圖卷

古人畫馬形與骨今人畫馬色與肉唐有韓幹筆意高  
宋有龍眠可相續今朝偶見三馬圖眼如懸鈴漆圍麌  
短鬃兩耳雙竹批風入四蹄如鐵蹴宋伯老蘇亦閑雅  
贊以詩文過金玉嗚呼安得九方臯見此須臾少回矚

趙汎

故人

故人別我秋江涘  
幾載重逢春夢裏  
忽觀明月憶高情  
愁絕長空三萬里  
荒山久病莫能興  
狂風暴雨何憑凌  
塵尾呦呦呼厭類雉媒  
戛戛求其朋

余村道中寄魯齋

青山並岸如蒼蚪  
石門翠樹如相繆  
似與幽人護清境  
玉梅翠竹縈寒流  
溪行半日足生蘭  
水望千回山百轉  
請君處處種桃花  
莫使重來迷近遠

古津渡夜談贈金元忠

相逢歲晚詩更誦  
燔盡枯槎談愈縱  
短茨低覆結冰花  
寒壓溪雲不成夢  
竹帛煙銷黔首愚  
紫芝一曲老商於  
坑外竟逃真學士  
浮丘雅頌濟南書

題碧山圖

嘗愛李太白  
興來棲碧山  
山中別有一天地  
惜無圖畫留人間  
誰謂碧澄翁  
久向山中住  
栽花種柳待春風  
忽見新圖識其趣  
青山淡淡雲離離  
小橋流水涵清漪  
抱

琴擇勝可終日安得似汝圖中時韓侯好詩仍好畫署  
酒不憂官長怪欲圖李白碧山居酒禁方嚴筆如借知  
翁有子舊曾遊淡泊無營心日休圖成漫與翁為壽願  
翁長樂無虞憂

登黃山鍊丹峰尋昔人隱處

我遊黃山當嚴冬雪消日暖無天風欲求昔人棲隱處  
發興况有高僧同危矼側步目已眩絕壁下瞰心為忡  
交流二澗瀉寒碧樵木不來蘿逕窮嵯峨亂石大如屋

跣踏豹虎登蚪龍手披灌木出林杪仰從雲際窺奇峰  
中高一柱揭南斗旁扶兩岫森寒松文楸萬本翠如織  
宛宛內蓄何沖融仙靈窟宅景象異豈與下界同汙隆  
名姓無傳年代遠只有藥臼留遺蹤摩挲考擊三歎息  
悵不並世來相從因憐李白升絕頂空吟菡萏金芙蓉  
幾年戎馬暗南國眼前厭見旌旗紅脫身長往宿有願  
把茅不用煩人工曹阮浮丘應好在山南山北會相逢

汪克寬

丁亥四月十四日陪尚書公澤民遊祥符寺分

得煖字

芙蓉六六森如鍾乘興登臨寄疎散綠沈靈湫老龍蟄  
翠護祇園新竹短山樂鳴空石洞寒金雞舐鼎丹爐煖  
蘚痕拂拭讀殘碑一浴靈泉客塵浣

題道士張湛然彈琴詩卷

嶧山白桐千年枝金星爛爛蛇蛻皮文光七軫藍田玉  
冰絃細遶吳蠶絲丹山雲煖鳳皇語露草寒蛩訴秋雨

娥英泣灑湘筠斑遷客相逢話羈旅翠巖懸瀑鏘瓊瑤  
雷霆霹靂轟層霄暫波細萍游蕩漾劈空輕絮飛飄颻  
仙林唳鶴驚離別老龍湫底吟寒月海門送子胥潮  
澎湃奔騰卷殘雪羽人瀟灑顏如仙憑虛來往黃山巔  
古音淨洗箏琵琶耳何須更濯丹砂泉

金涓

姑蘇臺

闔閭城畔姑蘇臺百花洲上千花開笙歌半空曉未絕

一聲落月啼烏來蛾眉顰翠愁如簇空捧春嬌在心曲

滄江羅網縱鯨鯢碧瓦丘墟走麋鹿悽煙慘日潮生處  
怨滿鴟夷猶不悟甬東東海不可棲劍光夜冷吳山路

朝陽臺

楚王昔日遊臺上前望巫峰近相向青楓錦石叢古祠  
暮雨朝雲依疊嶂蔓花古木多春寒翠帷仙佩非人間  
神功治水佐禹跡至今石刻巍如山詞臣錯寫高唐賦  
剛道朝雲夢中遇千尺黃湍洗不清水聲猶望臺前怒

黃金臺

昭王有志興宗社  
厚幣卑辭禮賢者  
郭君一語捐千金  
國士爭趨駢駟馬  
燕臺計議皆英豪  
齊人蹴踏猶兒曹  
三軍旗幟白日動  
半空劒氣青雲高  
樂生既去士亦少  
回首春風長芳草  
火牛遂復七十城  
恨滿臺荒天地老

戲馬臺

將軍逐馬關中來  
神威掠地風雲摧  
鴻門舞劒成敵國  
彭城衣錦空登臺  
馳下漢軍何披靡  
垓下楚歌相應起

山河百二幾諸侯子弟八千無一騎古來天下誰英雄  
荒臺老樹悲秋風符命合歸赤帝子項伯不忠范增死

謝應芳

耕隱為蕭徵士作

蘭陵溪上梅花村世居齊梁之子孫瀕溪沃壤足禾黍  
教子讀書深閉門時人笑渠生理拙渠亦笑人多覆轍  
春來烏犍一犁雨歲晚黃精三尺雪有時獨往舞短蓑  
飯牛別作耕田歌長安車馬自塵土奈爾濯足滄浪何

君不見蘇秦為無田負郭平生不識耕田樂奴顏婢膝謁諸侯黃金載多褐隨作君今有田兼有書夜親燈火朝翠鉏只恐一朝富貴逼人去猿鶴笑人留不住

鮮于瑞卿還碧亭

鮮于公子平泉莊有亭翼然水中央天光雲影白日靜  
菱葉荷花清露香柳下繫船魚可釣座中留客酒盈觴  
門前漁浦接洮渴白鳥飛去煙蒼茫

寄惠山鑒長老

太湖之陽九龍峰金田蟄爾僧中龍山頭雲出野漠漠  
石眼泉落聲淙淙呵冰古硯寫墨竹埽雪幽軒看碧松  
別來兩度歲年晚祇見梅花信一封

呈趙徵士

吳姬手執金叵羅春風笑面生紅渴主人留客長夜飲  
客拜主人持酒多主人沉醉客亦醉客散扶歸主人睡  
殘杯冷炙廚頭傾鄰家兒有啼飢聲

題林泉雅趣圖贈杜玉泉

泉翁愛山如愛客到處好山皆莫逆脚根不涴京洛塵  
面紋長帶煙霞色奚童抱琴翁曳屨長日山中看流水  
萬松清賴響如絃滿地白雲吹不起桂花蘿月秋復春  
野花幽鳥情相親巢由相去數千載黃綺以來能幾人  
山巔天涯風物美都在我翁詩卷裏莊周夢蝶蝶夢周  
覽是圖者同天游

贈楊君濟縣丞

我昔昆山鋤白雲高軒訪我麋鹿羣我今長洲釣明月

君復過此寂寞濱感君相知式相好與君談笑開懷抱  
坐分半席白鷗沙滿目青山淨如埽社公雨晴風作惡  
村北村南花自落勸農來往杏花村雞犬不驚田舍樂  
君歸哦松坐松陰我舟更入菰蒲深釣鈎無餌勿語人  
但說煙波無處尋

盛彥英隱居太湖之陰號具區耕叟命僕作詩  
以歌詠其樂云

脫屣東華塵躬耕太湖濱桑麻接鄰里魚鳥情相親閒

時讀書牛背上安知六國方攻秦東風二月桃花雨布  
穀飛來向人語一犁初破隴頭春黃犢出闌健如虎羲  
農世遠莫可追南山石爛無足悲悲歌笑寧戚夜半猶  
未已人間間是非何用汚牛耳我田已耕春晝閒樵童  
隨我看青山日暮歸來一壺酒我歌烏烏童拍手童拍  
手兒飯牛一天星月爛不收重捻戲笛作三弄七十二  
峰俱點頭

陽羨茶

南山茶樹化劫灰白蛇無復銜子來  
頻年雨露養遺植先春粟粒珠含胎  
待看茶焙春煙起翦籠封春貢天子  
誰能遺我小團月煙火肺肝令一洗

送李彥明歸高郵

老夫歸來東海頭春風送客歸秦郵  
出門復覩鴈北鄉物我喜得同悠悠  
吳船鼓櫂渡江去烏輪正挂扶桑樹  
桃花倚岸笑相看杜宇催人啼不住  
征袍十年塵土多濯纓今作滄浪歌  
一百五日寒食雨三十六湖春水波

交遊臺榭翦荆棘繼美前修集嘉客誰能喚起老龍眠  
重寫耳孫湖上宅

雪巢為馬仲良賦

馬鞍山高數千尺考槃之阿環大澤梅花為屋雪為巢  
窗戶玲瓏虛室白諸公衆衆登雲梯若人奚獨能幽棲  
澹然素志絕華藻要令朴俗還標枝藍開策馬官遠謫  
居延牧羝羶盡齧何如雪飲樂巢居更與党家風味別  
梨雲無夢親如許膝上兒郎賦冰柱此生此樂慎勿移

聽取龜巢老人語

題夜潮圖

昔余夜醉錢塘酒看潮八月中旬後銀山湧出海門來  
潮聲殷若雷霆吼此圖之作知幾年當時景物皆依然  
雲山兩岸淡籠月雪岸一江高拍天一觀頓覺毛髮立  
再觀祗恐衣裳濕扁舟漁子任掀舞別渚鷗鳴自翔集  
奔騰澎湃無足驚人間平地風波生乘桴尼父果浮海  
從游我欲跨長鯨

李仁

題鐵網珊瑚圖奉和黃鶴山樵贈范玉崖韻

黃鶴山人多意氣真是高亭老仙子揮毫鬢髪如有神  
怪石嶙峋筆端起琅玕玉樹生雲根畫圖奪得江南春  
邇來遨遊東海上持贈玉崖之高人兩翁相逢遂傾倒  
醉裏不知天地老持竿共結滄洲期一釣猶嫌六鰲小

周崇厚

竹深處詩

知君雅性恒愛竹幾年封殖當華屋此君結根羨得所  
風雨年年長蒼玉綠陰滿地蔭堦墀拂雲香葉何參差  
萬竿總含霜雪操數畝盡帶瀟湘姿芸窗晝啟無俗客  
秀色時能映緗帙猗猗堪比衛武賢青青差擬王猷宅  
我來薊北正天寒雪中無處尋琅玕坐想君家最深處  
便擬敲門試一看

陳潤

竹深處詩

金臺名宦姑蘇客客裏相逢見顏色手持詩卷錦離離  
珠玉聯翩光耀日自言平昔愛此君手裁十畝吳江漬  
蒼龍起舞淇園夕彩鳳長鳴湘水春客來倒屣邀偕去  
擊筑彈棋不知暑紅塵半點飄不來好音一雙向人語  
逍遙深處深復深等閒忘却樊籠心何時買棹東歸去  
願借繁陰事討尋

丘處機

題劉節使所藏顯宗御畫莊子像

顯宗好道當年壯手筆南華形狀南華去世千載餘  
狀貌風格知何如只是今人重古道彷彿氣象加襟裾  
至人胷中本無待萬竅吹噓任天籟楊韓嵇阮心不同  
到了各歸於大塊

赴龍巖寺齋以詩題殿西廬

杖藜欲訪山中客空山沉沉澹無色夜來飛雪滿巖阿  
今日山光映天白天高日下松風清神遊八極騰虛明  
欲寫山家本來面道人活計無能名

張與材

張公福地

秋風吹衣草樹涼巨靈守護神丹光袖攜天香入洞府  
散作雲霧空蒼茫拄杖鏗然響微步石髓垂垂潤甘露  
時當相遇五百年分明中有昇天路

馬臻

無事

無事每日不出戶滿院松竹森交加晝眠厭聽啄木鳥

早涼喜見牽牛花一真自可了生死萬事不必論等差  
誰能屑屑管迎送客來且試山中茶

題湘靈鼓瑟

沅湘水閣風蕭蕭水風敲珮天光搖為彈寶瑟傳幽情  
一點柔紅瀉香露蒼梧恨鎖雲欲流湘花背日烘春愁  
人間有夢到不得仙山翠滑江浪黑

為楊簡齋題空蒙圖

西湖天下奇回薄太古色春風散花柳元氣蕩空碧淡

然存天真豈為歌舞惑我家本住湖水邊筆牀茶竈依  
漁船振衣一別五千里為君展卷心茫然欲問吾廬在  
何處但見老木浮寒煙吾廬不可尋山川不可越人生  
行止會有時長嘯階前望明月

寄漱川楊如山

吾聞沙丘之馬黃驪牝牡世莫知九方臯去不復有天  
風吹我滄海邊忽地相逢釣鰲手論文託契輸心胸傾  
倒金尊斟綠酒登高望遠古意多百年之樂能幾何男

兒屑屑志不展秋霜滿鬢空蹉跎酒酣眼極情未畢笑  
指青山歌落日却憐徐福向蓬丘蒼蒼煙浪無消息明  
朝挂席我歸來西湖十月梅花開梅花開動詩思思君  
不待春鴈回因之一寄平安字

送陳渭叟歸山中

人生少至百一別動經載不信歲月馳請看容鬢改先  
生本是超絕人長竿學釣清渭濱釣頭不解挂芳餌岸  
草汀花空復春大魚小魚求不得芒屨忽厭人間窄手

攜詩卷出萬山來覓湖邊閑。開客終朝相對百不為。  
口  
中咄咄唯言詩飛花濁酒日色靜。天地悠悠知者誰。  
興  
盡翩然即歸去鶴巢雖在門前樹。他時我亦訪君家。但  
問青山白雲處。

題李安忠畫雪岸寒鴉圖

北風萬里吹石裂。古樹槎枒摧朽鐵。羣鳥啞啞如苦飢。  
倦飛還向空林歇。孤村荒寒得食遠。日暮沙邊啄殘雪。  
回情訴意各有態。羨殺畫師心更切。我嘗記得天隨詩。

至今讀之長激越婦女衣襟便佞舌始得金龕日提挈  
老烏老烏爾身毛羽黑離離况復人間厭爾啼何不飛  
鳴丈人屋丈人屋頭春柳綠

題唐十八學士圖

唐家天子尊黃屋大業隆興調玉燭當年十八登瀛仙  
弘文日侍分三六兩京初定四海清君聖臣賢古難續  
立本圖真亮為讚遂令書府藏諸續後有龍眠傳此本  
禮樂衣冠激流俗自從淪落向人間畫手紛紛互翻覆

千年事去君莫問留得青編遣人讀蕭蕭馬耳射東風  
長安道上春山綠

裁孤松為九華山鍾道士作

九華何崔嵬融結本真宰神氣之所鍾雲物足瀟灑挺  
挺秦大夫獨立而不改既出衆木羣豈為豔陽待初疑  
凍蛟掉禿尾忽若山靈張偃蓋又如玄鶴歸來視城郭  
悵別人間動千載楚南靈椿浪得名茫茫天壤知何在  
流精貫浹骨欲飛風雨或致雷公怪林林紅紫索價高

幄錦圍春鬪光彩憐君令色不隨時空負才名成感慨  
留向青山閱古今為問桑田幾滄海

鄧牧

贈友人

我在越君在吳攜書邀我遊西湖我還吳君適越迷隔  
三江共明月明月可望佳人參差與君攜手西湖上相  
思空誦停雲詩知君去埽嚴陵墓祇把青樽酌黃土浮  
雲茫茫江水深感慨空勞弔今古孤山山下見陳實連

騎東來踏春色湖邊千樹花正繁莫待春風吹雪積有  
酒如澗有肉如林鼓趙瑟彈秦箏與君沉醉不用醒人  
生行樂爾何必千秋萬歲名

吳全節

登大茅峰

第一福地第一峰玉臺積翠摩蒼穹大君成道二弟從  
還丹返老顏如童繡衣趣召凌天風此事萬古將毋同  
山高有仙水有龍龍腹如篆朱砂紅蜿蜒變化理莫窮

作霖濟旱年屢豐神仙為市壇朝宗真人渙號芝泥封  
猿鶴相語千載逢葵心耿耿通宸楓萬里六轡馳花駛  
香飄龍篆江雲東瑞凝草木氣鬱葱稽首峰頂歌元功  
他時歸奉明光宮

薛元瞻

題高尚書夜山圖

高李風流仕西浙共倚危樓望吳越吳越江山千萬里  
高侯畫對中秋月生紙經營入董源朦朧煙樹迷宮闕

玉露沈沈四次寥潮聲已息蕭聲咽不寫思陵金盛時  
空遺白塔堪愁絕君不見王子猷亦向山陰弄雪舟誰  
拈禿筆埽清遊古今嘉致總悠悠

黃石翁

飯山道院

萬鍾鼎食不到我正自不必西山餓飯山雲氣如炊煙  
三餐而返腹果然臨川丞相有素願何處獨無魚羹飯  
勸君飯客先飯窮往往乞匄皆英雄

送高麗五明馬

海波不動開梁通  
蚪髯使者來吳中  
名駟額間挂明月  
四蹄猶帶龍堆雪  
仰秣不受田家芻  
大官之羊五味俱  
賢才萬里不難致  
糠粃不充吁老矣

鄧宇

題錢舜舉秋江待渡圖

秋江已平秋葉黃  
有客待渡秋水長  
停橈切莫歌白苧  
白苧歌成秋露涼  
鴻飛冥冥白日晚  
客心茫茫愁欲斷

微波咫尺不可通何況精靈隔霄漢

題阮郜閨苑女仙圖

閭風玄圃仙女居阮生寫作羣仙圖蒼松根老琥珀伏  
海波突兀湧珊瑚翠樹瑤花紛遠近細草若展青耀瑜  
樓臺迴隱五雲表別有世界非堪輿仙姿縹渺各有態  
絕食煙火餐瓊蔬兩仙拈筆點花露長者晏坐看琅書  
一仙倚石閒摘阮一仙偃蹇披長裾其中一仙速相就  
珮聲微響如雲趨羽扇雲鬟盡婀娜忽見龍鶴來天衢

翩然復有一仙至乘飈御氣三從俱我疑數仙天帝女  
帝傍暫別遊清都俯視塵網中穢濁何紛如人間光景  
疾如箭壺中日月無居諸舞白鳳歌且謠有耳只解聞  
雲韶永超劫外何逍遙紫陽真人特勿驕竚當來迎共  
食瑤海桃

張雨

聽雨樓

雨中市井迷煙霧樓底雨聲無著處不知雨到耳邊來

還是耳根隨雨去好將此語問風幡聞見何時得暫閒  
鐘動雞鳴雨還作依然布被擁春寒

遊惠山寺

水品古來差第一天下不易第二泉石池漫流語最勝  
江流湍急非自然定知有錫藏山腹泉重而甘滑如玉  
調符千里辨淄澑罷貢百年離寵辱虛名累物果可逃  
我來為泉作解嘲速喚點茶三昧手酬我松風吹兔毫

趙千里聚扇上寫山次韻題

翠水丹山氣磅礴幾疊香痕經手握何年破鏡飛上天  
吳淞水翦并刀薄江南寶繪多遺餘王孫不歸恨靡蕪  
靡蕪消歇秋風起班姬為我歌烏烏

王時敏聽雪齋

頑寒颺扇河流澌銀濤鐵騎交奔馳玲瓏淅簌瓦溝滿  
坐窓已有幽人知東家暖客紅醅凝嘈雜新聲迷聽瑩  
後園壓折萬琅玕雪多政自無人聽我時空山夜寂寥  
風篁雪竇篩瓊瑤希聲疏越不可盡鳴球戛擊如聞韶

憶昔齋居困學翁大書聽雪煩楚龔百年勝事將無同  
不傳師曠傳王恭鶴氅明朝行雪裏須辨龍頭煎雪水  
牀下何人聞鬪蟻喚起春雷來洗耳

次韻率性來山人見貽之作

南峰後靈石前嵐霞蒨絢爭春妍貧家客來淨掃地亦  
有一瓶紅杜鵑東坡七過山南塢山人能記坡翁語君  
方騎馬聽朝雞為我入林來聽雨雨聲吹斷聽松聲怪  
石長松為友生憐君慰我支離者不飲向人空復情我

如病馬離羣去君如伯樂能相顧羊羣好在金華山夢  
裏相逢猶識路

早春對雨雜言

寒谷望春如望赦雨雨風風惡相嚇牀頭敗絮未嘗溫  
石上瘦花渾欲謝三時儘辨禽鳥鳴合澗助為風水聲  
白水田頭漫無路老稚種麥已青青朝晴獨見扶犁叟  
人生合作扶犁耦不須識字只耕田酒杯也到扶犁手

于立

漁莊

二月春水生三月春波闊東風楊柳桃花江上魚吹沫放  
船直入雲水鄉蘆荻怒芽如指長船頭濯足歌滄浪蘭  
杜吹作春風香得魚歸來三尺強有酒在壺琴在牀長  
安市上人如蟻十大紅塵理馬耳漁莊之人百不理醉  
歌長在漁莊底

玉山佳處

春風昨夜起吹蕩滄江水幽人渺何處迺在玉山裏玉

山秀色何崔嵬滄江之水長紫迴繁迴不盡遶山去但見滿谷桃花開草肥青野鹿呦呦花下殘棋暮不收鄰家野老長攜酒溪上漁郎或艤舟幽人讀書忘世慮結屋山中最佳處世上紅塵空白頭攜書我亦山中去

題虞瑞岩白描水仙

瀛洲之君號中黃玳冠翠帔懸明璫通明宮中拜帝觴帝遣換骨生天香醉後橫斜踏明月月明零亂如冰雪為傳清影落人間化作幽芳更愁絕官車曉過西陵渡

貝闕珠宮鎖煙霧君王十二玉闌干玉盤倒瀉金莖露  
江風吹斷舊繁華年年十月自春花寫成幽思無人省  
持獻瑤池阿母家

題從子倫畫山水

我本山中人頗有愛山癖何人寫秋山秀色如可食天  
河露下秋漢白挹露摩空洗秋色洞如洞庭水浸青芙蓉  
倒影天光湛空碧又如飛龍天外來鱗鬚森森插霜  
戟遠嶼瀰茫隔煙浦冷雲濕翠愁痕古便從海上訪三

山又恐征帆迷處所若耶溪在何處歸去來山中住道  
逢仙人紫綺冠指點丹崖是征路寄書松竹問平安莫  
嫌老子來遲暮

擁翠堂詩卷

幽人結屋江邊住俗聲不到題詩處門前惟有樹扶疎  
簷間只許雲來去落花如雨東風狂綠陰滿地春茫茫  
一聲啼鳥驚夢破翠屏淺印煙峰長海綃輕薄煙霏暝  
空碧無痕湛清影天風吹落竽賴寒嵐光濕透衣裳冷

我生已有遺世心便欲長往窮幽尋微茫樓觀不可到

雲林冥冥苔碧深

題花蕊夫人像

玉屑丹砂和獮髓一點殷紅養花蕊冰肌玉骨自生涼  
不信流年去如水火旗曉壓降王道貝闕珠宮長秋草  
摩訶池上又西風流紅不向人間老

題蘇小小像

花宮玉燕啼酣春春風勞勞驅夢雲夢嗔夢喜春不聞

紅萱露滴珍珠裙夜燕玎玲隔窗語碧紗凝煙咽金縷  
行雲妬殺巫山女芭蕉葉葉黃梅雨

姚草樓

送丘阜之江東省大姑巫節婦

丘郎一幅布帆風云省大姑江水東仙家二月碧桃滿  
人世幾回青草豐練衣如霜鬢顏好見姪身長念兄老  
千里書還墨未乾三茅峰高雲可掃

蔣景玉

周孝侯祠

長橋怒東西來水空巖煙雨招山鬼斬蛟射虎安在哉  
千古荒丘埋劒履淒涼往事今何如坐令道路成康衢  
當年蛟虎不復有嗚呼人害無時無

明本

留題惠山寺

惠山屹立千仞青俯瞰天地鴻毛輕七竅既鑿渾沌死  
九龍攫霧雷神驚霹靂聲中白石裂銀泉迸出青鉛穴

惟恨當年桑苧翁玉浪翻空煮春雪何如跨龍飛上天  
并與挈過崑崙巔散作大地清涼語免使蒼生受辛苦  
我來叩泉泉無聲一曲冷光沈萬古殿前風檜砉然鳴  
日暮山靈打鐘鼓

祖瑛

題良上人所藏天錫先生青山白雲圖

今人作事每師古摹倣太甚復可嗤要於法外出新意  
變化臭腐為神奇襄陽畫法妙前代千金一紙爭購之

郭公丹青有能名亦復愛之如渴飢今觀此幅殆逼真  
氣骨老蒼無俗姿青峰碧澗在煙霧令人益重幽人期  
沃州天姥見彷彿支公寺前秋鶴飛橋危霜滑筍輿小  
憶得前度曾攀躋郭公久矣閟泉壤此幻不減留齋咨  
前身太白無乃是句法酷似金山詩

行端

趙李倪三居士建凌霄會求贈

雙徑在吳浙實為山之雄天目如屏擁其北錢塘似練

紓其東重巒疊巘不知幾千萬但見五峰秀色峭翠摩  
青空下有跋陀神龍窟上有覩史夜摩宮晴雲暖靄生  
巖松朝開暮合無終窮祖師據此鞭麟鳳森羅萬象明  
真宗納須彌兮于芥子卷法界兮于鍼鋒本源自性有  
常分寧須妙用求神通儼如鹿園與就鴟嶺紫金光聚人  
天中說法至今猶未散天華似雨飄空濛

清珙

天湖卜居

晴明無事登霞峰伸眉極望開心曾太湖萬頃白瀛灔  
洞庭兩點青濛茸初疑仙子始綰角碧紗帽子參差龍  
又疑天女來獻花玉盤捧出雙芙蓉明知此境俱幻妄  
對此悠然心未終徘徊不忍便歸去夕陽又轉山頭松

覺恩

三姑祠

三姑廟前春水生百婆橋畔曉煙橫誰家草屋映疎柳  
門外香茅初可烹荒坡斷岸無牛跡雨後閒行興何極

什什伍伍何處郎行船打鼓春賽忙

清欲

秀巖贈挺首座

千巖秀出萬物表下視乾坤一何小散華無路到諸天  
只許青山自圍繞青山不礙白雲飛丹厓豈逐春風老  
擬問巖中事若何春來拂曉聞啼鳥

師文

玉龍山

山中九日流清暉涼飈滿堂吹客衣黃花翠枝著蕊細  
欲採未採情依依維侯好事美無度載酒與客登山扉  
陰陰蘿磴出良久長嘯響遏白雲飛良辰美景不易得  
龍山舊事人今非舉杯勸客盡樽酒莫辭薄暮山中歸  
文信

題吳仲圭為松巖和尚畫竹

吳郎平生真不俗千畝琅玕在渠腹有時寫出與人看  
葉葉枝枝動寒綠之子愛之如千金袖中戛戛鳴玉音

莫教風雨化龍去明日葛陂何處尋

題趙彥徵畫

吳興之山弁山好碧嶂丹崖淨如掃雲開影落水晶宮  
妙處不傳休草草玉堂學士文敏孫筆意慘淡深討論  
大峰揚旗出天闕小峰倒翹如鷁搏清溪過雨泉聲壯  
茅屋疎林更蕭爽他年此地巢雲松一笑人間脫塵鞅  
與白雲山人夜坐山林將歸天台即席賦此送

之

杪櫂樹頭月皎皎共坐論詩天欲曉大星飛落滄江前  
小蟲啼徧牆根草我愛高人白雲姿對客長賦白雲辭  
漫遊羣仙白銀闕拾得碧海珊瑚枝又載雲輶下塵世  
涼飈微動青霞袂一聲鐵笛徹層霄鸞鳳和鳴滿雲際  
高人讀律仍讀書白頭在堂辭我歸慙慙綵服壽春酒

江城八月秋暉暉

自恢

湖光山色樓以吳東山水分韻賦得崑山

馬鞍山在勾吳東山中佳氣常鬱葱層巒起伏積空翠  
芙蓉削出青天中六丁夜半石壘辟殿開煌煌絢金碧  
響師燕坐講大乘虎來問法作人立天華散雨娑羅樹  
一聲共命雲深處我時細讀孟郊詩興來更上龍洲墓  
憶昔曾同信信友七尺枯藤長在手數年音問墮茫然  
頓覺羈懷醉如酒嗟彼習俗耽歡娛錦鶯細馬紅糴渝  
畫船吟荊撾大鼓吳兒棹歌越女飲只今歌樂難再得  
面顏已帶風塵色何如張宴溪上樓山光倒浸湖光白

我愛虎頭金粟子十載論交淡如水每懷故舊參與商  
二老到門驚復喜我留玉山君即歸天風泠泠吹客衣

人生會合如夢寐焉能對酒如吁噦我歌長歌君起舞

山川洵美非我土褰裳涉澗采昌陽且向山中作重午

福初

題顧仲瑛漁莊

君家漁莊在何處江波迢迢隔煙霧清秋獨釣蘆花風  
明月長歌白蘋渡高堂絲管延嘉賓舉網得魚皆錦鱗

小奴鸞刀出素手金盤斫鱠如飛銀走也山林老釋子  
拄杖行吟嗟未已平生雅有濠上游相思瀰瀰東流水

行方

顧玉山草堂席上寓興

春暉樓頭春最早主人宴客情更好萬斛蒲萄瀉綠波  
一色瓔瑜翦芳草捲簾山色何冥冥吳天半掃蛾眉青  
亂雲忽西起倒壓白日停野狐啼煙道路黑海風吹雨  
蛟龍腥短歌長吁傷我情門前溪水聲泠泠

宗行

中山堂為許隱君作

俗子居山不見山靜者居屢山在眼請看東郭許隱君  
中山之堂最蕭散堂前種竹堂後萱春深苟長萱花繁  
大兒稱觴壽花下小兒讀書當竹根城中無山亦可樂  
城中有虎仍戴角歸來不愁虎食人閉門日醉中山春

題川船出峽圖

瞿塘險為三峽門兩岸束急洪濤奔十丈江船萬斛力

一蒿失勢原無根前船纔過後船出蜀商來往無虛日  
君不見人間行路難咫尺風波永相失

舟中夜歸

夕風蕭蕭雲氣亂蒿子移舟頻觸岸溪頭犬吠聲轉寧  
沙際人歸暗相喚兩三家村稍已近十五里程纔過半  
一星不出雨欲來時復推蓬仰天看

惟則

贈道林訓上人

角鷹一側目所視無穹蒼臂轉索飽非所長良馬一振  
鬚所向無窮荒內閑待秣安可常丈夫心膽塞天地身  
與世道為低昂况從世外發高趣蓬蒿豈足誇翶翔我  
憐古道滿荆棘荒涼日暮增感傷今年識君谷水傍愛  
君駿氣如鷹揚願君莫如我學步成踉蹌願君莫如我  
用拙甘六藏茅舍深居已無馬師問梅子木葉散膝尚  
有懶瓊知南陽九峰之外天茫茫寒梅欲花春隕霜興  
來拂袖謝丘壑閑視四海皆吾鄉我有解纜歌一章如

擊瓦缶無宮商吳淞江上為君歌一發怒潮捲雪天風狂

遊三相臺示甘楊諸友臺乃姚崇牛僧孺劉沆  
讀書處也

我登三相臺南望雙翼峰俯視下界如凌空開元老樹  
可百丈斷崖盡日呼顛風甘郎攀果學猿挂楊子枕石  
飛泉中垂藤離地坐我穩袒跣長嘯如乘龍鳴呼昔人  
不再得臺上土花幾秋色前身不與後身期白雲豈識

蘿衣客安得近代顏輝來畫我石上驚風雷

送止照歸古洪曲江二首

暮雲飛上錢王臺亂峰蘸碧湖光開六橋春色看正好  
之子不肯重徘徊百年萬事煙雨過鄉井一念終難灰  
浩歌歸去送歸去夢斷楚水何時來

鑾江鎮上雙江洲大船解纜荒洲頭挂帆散空槌鼓發  
白浪捲雪風蕭颼故山三日忽到眼恍惚天上飛驛鴻  
向來歸興有如此今日送子心悠悠

入仙洞山

入山隱隱如聞雷山雞角角隨人飛松風洗我市喧耳  
松露灑我青蘿衣平生結習重幽賞會景會物情依依  
誰能歌紫芝我當歌采薇招呼雲外青鸞歸

上海舟中即事

烏溪出閘催雙槓急趁回潮下黃浦午前期到上洋城  
生怕潮來近亭午夜潮已落岸痕高風捲浪花翻雪濶  
渡頭趁渡人如雞水行泥行亦良苦西岸衝波遠入村

東岸湧沙作林圃岸上居民無定蹤頗怪潮行無定所  
吾年五十遊上洋今歲重來五十五豈無玉雪美少年  
向來一揖成千古亦有鴟張萬石家勢去一朝無寸土  
噫吁嘻人生幻化若浮雲陵谷變遷何足數

大訴

太白觀瀑布圖

我本白雲人見山每回首披圖得松泉感我塵埃久我家只在九江口從此扁舟到牛斗翻愁天上銀濤堆石

轉雲翻萬雷吼水行地底不上天龍泓豈與滄溟連風  
葉無聲飛鳥絕月光雲影天茫茫大人何來自空谷謫  
仙招隱當不辱林梢噴雪舞飛華尚想隨風唾珠玉馬  
首青山如喚人歸來好及松華春泉香入新釀解公頭  
上巾今者孰不樂荒墳委荆榛遂令畫師意萬古留酸  
辛酸辛復何益東海飛紅塵

駿馬圖

世無伯樂亦久矣駿馬何由千里至披圖猶似得權奇

豈伊畫師知馬意何人致此鐵色驪旋毛繞腹新鑿蹄  
帝閑遠謫千駟下馳來月窟浮雲低古王有土數千里  
八極周遊寧用爾方今萬國效奔命合遣龍媒獻天子  
飈馳電沒爭辟易萬里所向無前敵男兒馬上定乾坤  
腐儒詩書果何益幾愁骨折青海煙黃沙野雪穹廬前  
幸逢好事寫真傳似向長鳴誰與憐嗟我身如倦飛鳥  
十年繭足愁山川安得千金購神駿攬轡欲盡東南天

初發金陵夜泊龍灣寄茅山道士李方外

人生不必行萬里亦不願讀萬卷書願為茅山十日客  
山僧坐列羣仙圖大峰揚旗出天闕小峰萬馬爭奔趨  
俄頃波濤忽破碎木末飛上金畢逋青書畫馳壇室靜  
玉鞭夜擊聞傳呼去年獨宿丹井下天風拂地迎麻姑  
今年許入玉柱洞誰遣旅食隨檣鳥懷人弔古夜寂寞  
寒江落月號猩鼯祖龍埋金玉氣歇梁宮晉苑沉煙蕪  
想見雲龍映朝日山中宰相良非迂

本誠

吳江長橋

天險不可梯白石不受鞭空疑幻人試幻術神輸鬼運  
來塵寰躋濤駕浪逕空闊盤結鈎鎖金連環又疑東海  
躍出萬丈白玉蚪挾風噀雨飛上天天高九萬不得上  
翻身飛墮長江邊蒼雲半濕瓊瑤冷弱水不隔蓬萊境  
兩岸遙分日月光中流壓破青天影江吞湖吐水勢雄  
南極地缺棲魚龍橋成壯觀奪天巧却笑造化無全功

大圭

次韻陳騷民惜春

金尊瀉酒胡琴語。白日長看華在樹。  
東風一夜來，戲人老紅飛盡。  
江南雨，勸君莫苦愛流芳。  
紅顏百歲終黃土，山人眼底不見春。  
古檜陰，陰翠蚪舞。

溥照

寄見心和尚

憶昔與君相別時，君能贈我楊柳詩。  
即今搖蕩東風裏，吳山越水正相思。  
長相思，情何極，矯首雙峰入天碧。  
峰

頭玉樹好容顏安得凌風生羽翼

印秋海

寄雪竈寺生書記

清泉白蘆八月秋寬鞶瘦策十日遊石牀風冷夜不寐  
冰絲繞指白雪流身名杳杳雲間鵠世事紛紛蕉下鹿  
雨晴春暖即相尋千尺雲頭看飛瀑

無方

登多景樓

大山千丈青岩堯長江萬古鋪瓊瑤銀河倒影落天塹  
海門日日來春潮偉哉孫劉輩壯志摩雲霄只今英雄  
遺草木秋霜肅殺寒不凋朱闌仄上橫斗杓煙巒直下  
明金焦黃鶴山空杜鵑老鴛鴦渚冷芙蓉嬌人間笑傲  
輸漁樵猶將興廢論前朝萬歲嶺千秋橋月明尚有人  
吹簫月明尚有人吹簫

鄭奎妻

掬水月在手

銀塘水滿蟾光吐  
嬌娥夜夜馮夷府  
蕩漾明珠若可捫  
分明兔影如堪數  
美人自挹濯春葱  
忽訝冰輪在掌中  
女伴臨流笑相語  
指尖擎出廣寒宮

弄花香滿衣

鶗聲響處東風急  
紅紫叢邊久凝立  
素手攀條恐刺傷  
金蓮移步嫌苔濕  
幽芳擷罷揜蘭堂  
馥郁餘香滿繡牀  
蜂蝶紛紛入簾戶  
飛來飛去繞衣裳

惜花春起早

胭脂曉破湘桃萼露重茶靡香雪落媚紫濃遮刺繡窗  
嬌紅斜映鞦韁索轆轤驚夢急起來梳雲未暇臨粧臺  
笑呼侍女秉明燭先照海棠開未開

愛月夜眠遲

香肌半殲金釵卸寂寂重門深鎖夜素魄初離碧海端  
清光已透珠簾罅徘徊不語倚闌干斗轉參橫風露寒  
小娃低語喚歸寢猶過薔薇架後看

無名氏

江叟吹笛圖

江楓葉赤蘆花白煙水茫茫晚山碧釣罷歸來酒一壺  
醉倚蓬窗弄長笛弄長笛無腔拍一任江南與江北

漢江

襄陽下來灘復灘七十二迴相見滄南風乍停北風起  
愁殺行路牽水難水寒白石光粼粼鱸魚短尾黃金鱗  
滄波蕩漾浴明月疑是弄波遊美人

御選元詩卷三十三

謹案第二十三頁後七行一仙倚石間摘阮刊本

阮訛玩據別本元詩改

第二十四頁後七行速喚點茶三昧手刊本速訛

連據張雨句曲外史集改

欽定四庫全書





總校官庶吉士臣侍朝

校對官檢討臣蕭九成

謄錄監生臣周元